



## EditOriaL

### Re-negosiasaun Kona-ba Linha Fronteira Tasi Tenke Lao ho Onestu

**GOVERNUN** Timor-Leste no Australia diskute namanas hela kona-ba linha fronteira tasi entre nasaun rua ne'e ninian.

Ekipa Konseillu Devinitiva Ba Delemitasaun Fronteira Maritima Timor-Leste (KDDFM -TL) ne'e lidera husi embaixador Timor-Leste ba Reinu Unidu Joaquim Fonseca.

Dili apresenta proposta ida kona-ba linha fronteira atu Canberra bele haree tanba re-negosiasaun ne'e mosu tanba governu Timor-Leste hakarak rezolve dispute linha fronteira maritima.

"Proposta ida ita haruka ba (Austrália) ne'e hanesan atu tulun hodi avansa prosesu ne'e, tanba ita hatudu onestidade, inisiativa hakarak resolve la'os hakarak atraza, tanba ne'e avaliasaun halo para haree señor Embaixador Joaquim Fonseca sei hasoru malu ho sira (Austrália) nia ekipa hodi rona hosi Canberra, sira nia hanoin kona-ba MoU ne'ebé hato'o ba sira," dehan Portavoz Governu, Hermenegildo Pereira "Agio".

Prosesu ne'ebe maka parte Timor-Leste halo ne'e bazeia ba rezolusaun ne'ebe maka Parlamentu Nasional halo iha tinan kotuk hafoin governu rua konkorda halo re-negosiasaun ba kazu Tasi Timor nian.

Ho prosesu ida ne'e, parte rua prepara hela hodi halo "funu" idea atu oinsa bele hetan solusaun diak tanba ladun diak kuandu vizinu rua ne'e odiu malu tanba rikusoins.

Solusaun ne'ebe mosu tenke justu. Kada parte tenke kaer metin prinsipiu internasional sira ne'ebe maka koalia kona-ba linha fronteira tasi no direitus umanus nian.

Timor-Leste la buka karidade husi Australia. Ida ne'e maka Canberra tenke hatene.

Kestaun ida fali mak parte rua tenke halo negosiasaun ho laran diak no onestu atu nune'e prinsipiu internasional sira bele lao tuir dala.

Kada parte tenke simu konsekuensia husi lia los ne'ebe karik sei mosu iha dialogu nia rohan katak rikusoins maioria iha tasi entre nasaun rua ne'e partense ba se nian.

Hirus malu nunka lori buat dia ida, satan rai rua ne'e besik malu no sira nia povu ajuda malu ona desde uluk kedan.

Orgulhu boot ida tanba to'o ohin loron relasaun bilateral entre nasaun rua ne'e diak nafatin. Ne'e hatudu katak governu rua iha duni maturidade kaer ukun. Kada problema tenke tau iha ida - ida nia fatin atu nune'e prosesu labele sai komplikadu.

Espera atu re-negosiasaun kona-ba problema Tasi Timor kontinua lao no hetan rezultadu diak hodi nune'e bele hametin liu tan relasaun bilateral entre rai rua ne'e. **Ita hein**